



Inc à Septentrione in Meridiem porrigitur *Skia*, omnium insularum circa Scotiam maxima: quadraginta duo millia passuum longa, alibi octo, alibi duodecim lata, in montes pluribus locis se attollens, ipsi silvis, silvæ pascuis abundant, campi frugum & pecorum fertiles: in his præter alia pecora greges equarum. Quinque amnes habet majores salmonum fecundos: multos etiam minores, nec eos salmonum steriles. Mare ab omni parte in terram penetrans multos aquæ salis sinus facit, tres præcipuos, tredecim item alios, omnes halecum fecundos. Habet & lacum aquæ dulcis, & quinque arces. Insula priscorum Scotorum sermone *Skianacha*, hoc est, alata vocatur, quod promontoria, inter quæ mare se infundit, velut alæ se obtendunt. Vfus tamen obtinuit, ut *Skia*, id est *Ala* vulgo diceretur.

Circa hanc sparsæ jacent insulæ minores, *Oransa* frugibus & pecore, *Cunicularia* nemoribus & cuniculis abundans.

*Paba* latrociniis infamis, quod in ejus sylvis prædones transeuntibus insidias locant.

Inde *Scalpa* octo millia ad æstivum Occidentem sita. Præter alia commoda magnos cervorum greges in sylvis alit. Inter ostium Caronis sinus & *Raarfam* jacet *Crulinga*, statio navibus tuta. Et à *Scalpa* duo millia in Septentriones porrigitur *Raarsa*, septem millia longa, duo lata: sylvas habet *Betuleas*, & in eis cervos. Quingentos ab ea passus est *Rona* sylvis & erica operata. Portum in intimo sinu habet latrociniis infestum prætereuntibus, insidiis tegendis aptum: & in sinus (qui à brevitate *Gerloch* vocatur) ore est ejusdem nominis insula. Et à *Rona* sex millia Septentrionem versus *Flada*, & à *Flada* duo millia *Tuilmæna*, & ad Australe *Skia* latus *Oransa*, & mille P. ab ea *Buja* parva, deinde *Buja* major, ac deinceps quinque parvæ insulæ ignobiles: post quas *Isa* fertilis frugum: & juxta eam *Ovia*: deinde *Askerna*, & *Lindilla*.

